

潛研堂金石文跋尾

潛研堂金石文跋尾續第一

嘉定錢大

三代

焦山鼎銘

右焦山鼎銘京口三山昔人比之蓬萊方丈瀛洲焦最僻左而名特著者以此鼎及瘞鶴銘在焉宋人好辨識鐘鼎文字此銘獨未著於錄其出於何時何地不可得而知矣古器銘多用鑿勒字惟石鼓及寅簋文正作鑿勒伯姬鼎則作攸勒寧辟父敦又作攸革薛尚功王保諸家皆釋攸爲鑿此文亦但作攸蓋古文之鑿勒卽詩所云條革也詩條革凡四見鄭氏箋或云轡或云轡首或云轡首垂毛公則訓條爲轡革爲轡首說文無條字而有鑿字訓爲轡首銅明乎鑿之卽條也釋器云轡首謂之革郭景純曰轡軋勒也詩如鳥斯革韓詩作勒明乎勒之卽革也

詩脩革有鵠鄭以鵠爲金飾古文脩从金與許叔重訓鵠爲金合孔疏謂以脩皮爲鵠首之革似未達古制矣伯姬鼎師毀敦竝有編必字薛氏釋必爲繹案攷工記天子圭中必鄭注讀如鹿直繹之繹是必繹古文相通此銘亦作必與康成注合

漢

北海相景君碑 漢安二年

右北海相景君碑王元美云益州當言刺史不當言太守于案漢時有益州又有益州郡郡有太守州有刺史刺史治廣漢郡之雒縣而太守自治滇池蜀漢建興三年始改益州郡曰建寧避州郡同名也此碑額題益州太守而銘稱守郡益州其爲太守非刺史明矣元美於史學未甚究心故有此失洪文惠謂景君嘗刺益部亦偶誤也銘辭云宜參鼎輔洪氏謂字書無輔字

當是借作拂取軼拂之義案

冕之紱古書或作拂此鼎拂當

碑陰

右碑陰題名一十八行每行三列凡五十四人而下云行三年服者凡八十七人則故吏之行服而不列名碑陰者尚多也碑末云諒闇沈思又云陵成宇立諒闇卽亮陰以非臣下可用而稱慕爲陵亦後世所宜回避也

郎中鄭固碑 延熹元年四月

右郎中鄭固碑下截已斷每行止存十九字詳其文義乃弟述其兄而作喪服傳不滿八歲以下爲無服之殤鄭君長男孟子七歲而夭乃建墳與固配食此禮之過而夫其中者論語邑斯舉矣斯乃語辭而漢魏人多用邑斯字如王充論衡翔而俊集

色斯而舉費鳳碑色斯輕翔費鳳別碑色斯高舉元賓碑翻習
色斯抱朴子外篇明哲色斯而幽遊內篇杜漸防微色斯而逝
皆以斯連上讀若張壽碑常懷色斯斥彭長田君碑色斯去官
抱朴子外篇或色斯而不終日三國志崔琰傳哲人君子俄有
色斯之志此碑亦云將從雅意色斯自得則竟以色斯當遠舉
之義所謂歇後語也春秋晉侯詭諸卒陸德明云左氏傳作僂
諸今本左氏亦作詭惟石經僂是僂字此碑造膝僂辭亦以僂
爲詭則古書僂詭通用矣

蒼頡廟碑

右蒼頡廟碑在白水縣東北五十里之史官村其地於漢爲衙
縣春秋秦晉戰於彭衙卽此地續漢志左馮翊有衙縣注引皇
覽云有蒼頡冢在利陽亭南墳高六丈後人因建廟於此縣以

彭衙得名兩漢志皆作衙字而碑作衙衙曲江之爲曲紅西城之爲西成也碑文雖漫漶諦視之尚有可識者惜洪丞相隸釋未著於錄不待其全文故不能通耳碑上穿之左有宋人題名四行云汲郡呂大忠華陰衙岳同過蒼頡祠下嘉祐庚子五月大忠者大防之兄嘗爲陝西轉運副使者也

碑陰及兩側

右碑陰文更漫滅其可見者有故督盜五官掾高陵守等字蓋隸屬題名而姓名無一存者其兩側面各有字尚可讀其一云朔方臨戎縣丞以永壽二年爲朔方太守上郡仇君察孝除郎中太原陽曲長延熹四年九月乙酉詔書遷衙令五年正月到官奉見劉明府立祠刊石表章大聖之遺靈云云下有上官鳳諸人題名三列歐陽集古錄題爲朔方太守碑陰者蓋卽此然

碑所述者御令孫戡筮仕本末朔方太守仇君則孫令之舉將與立祠無與乃以朔方守標題誤矣其一題名三列有議曹史功曹書佐騎吏高陵左鄉有秩萬年左鄉有秩蓮勺左鄉有秩池陽左鄉有秩夏陽候長粟邑候長等歐公亦有跋而不知其爲何碑之陰蓋碑本四面有字歐公僅得其兩側又誤分爲二趙德甫金石錄有蒼頡廟碑卽碑之正面又有蒼頡廟人名卽碑側之一而其又一面與碑陰則趙亦未見洪文惠則全未之見予訪之廿年未得頃曹中允來殷遊秦中始募工搨以餉余以歐趙洪三家未能盡見者而予幸得之誰謂古今人不相及乎

淮源桐柏廟碑 延熹六年正月 元人重書本

右淮源桐柏廟碑漢刻久亡元至正四年同知唐州事杜昭旣

脩祠廟乃請翰林待制浚儀吳炳重書炳子嗣昌填摹上石炳分隸頗有法度而少漢人淳古之氣碑末記亦炳所述行書殊適美中州罕拓碑手故流傳者寡而碑估之黠者往往割去炳重書字及碑後記裝界成冊收藏家未見全文遂以爲真漢刻矣朱錫鬯疑爲後人重摹而不得其主名潘次耕又疑爲唐人釋曠書蓋兩公所見者皆裝界之本耳但錫鬯謂碑闕靈祐二字此本却未闕又謂碑云盧奴張君今盧奴下闕一字非張字豈錫鬯所見者又別一本耶

竹邑侯相張壽碑

建寧元年五月

右竹邑侯相張壽碑僅存上一段每行十餘字中間又鑿去四十字卽明時人斷爲碑趺者今在城武縣孔廟戟門壁間說文眈視近而志遠也觀內視也觀與眈音同而義亦相近先儒傳

易皆作虎視眈眈此碑乃作覲覲是古人固通用矣王輔嗣釋
眈眈以爲威而不猛碑云覲覲虎視不折其節意亦相類也
機云碑在單州城武宋時太隸單州也

淳于長夏承碑建寧三年

右淳于長夏承碑字體奇怪王秋澗以爲蔡中郎書雖出臆揣
要是漢隸之佳者今再經翻刻古意盡失矣碑云策薰著于王
室薰卽勳字攷易艮九三厲薰心荀爽本薰作勳蓋勳之譌孟
子太王事獯鬻說苑太王有聖人之思故事勳育史記周本紀
作薰育此薰勳相通之證也沈州本因沈水得名今尚書沈州
之沈作究與沈水異文而說文無究字篆書家不知究字所从
難以下筆予謂古文从水者或用立水如江河之類或用橫水
如諡類之類沈本立水或從橫水作究而隸變爲究爾此碑與

曹全碑俱作究亦三之變文也

司隸校尉魯峻碑 熹平二年四月

右司隸校尉魯峻碑文云有黃霸召信臣在潁南之歌霸守潁川信臣守南陽此稱潁南者各舉其一字也三國人多稱吳會稽二郡爲吳會亦類此蓋流俗之稱文人沿用而不察爾胡三省云太史公謂吳爲江南一都會故後人謂吳爲吳會予案史公貨殖一篇言都會者多矣何獨於吳稱會此胡氏之臆說而近人多取之何也

碑陰

右碑陰題名二十一行每行二列故吏四人門生三十七人義士一人各列郡縣姓名字及錢數攷洪文惠隸續所載魯峻碑陰與此全別洪公在南渡時未得親至碑所但據收藏家之說

題之故猶疑而未定碑今在濟寧州學其陰文字尚完恨洪公之不及見而洪所指爲峻碑陰者世已失傳竟未審爲何人碑也

校官碑

光緒四年十月

右校官碑溧陽人頌其長潘乾構脩學宮而作隋時割溧陽西鄉置溧水縣宋南渡初溧水尉得碑於固城湖中其後移置縣學碑遂爲溧水所有矣釋名誄累也累列其事而稱之也廣韻誄壘也壘述前人之功德也誄本爲哀死而作今縣民頌其長而稱誄雖亦累德之詞然失其義矣說文取堅也古文以爲賢字公羊經鄭伯堅卒釋文本作取疏云穀梁作賢蓋取賢本一字古今文異爾今本公羊穀梁皆作堅與左氏同矣此碑親取賢皆師取作朋皆从古文其書籀豆之邊爲匱亦籀文之變也

校官碑釋文 元至順四年五月刻 附

右校官碑釋文卽洪文惠所釋也元至順癸酉濟陰單禧官渠水始刻之石而跋於下方又補洪氏所闕者八字改正者兩字

中部督郵郭尚等題名

曹 薛夏侯 泰曹史卞

蔣 解曹史文陽

曹史 曹 曹史蕃

中部督郵蕃郭尚 中賊曹史薛苗

南部督郵文陽 左賊曹史

北部督郵魯王壽 右賊曹史

守 左決曹史

史薛

曹史

曹

右中部督郵郭尚等題名可辨者十行曲阜人顏懋倫所藏始著錄於牛運震金石圖然釋文頗疎舛海寧陳上舍以網別有釋文視牛稍詳頃大興翁學士方綱復攷牛陳同異別爲之釋得字八十有四多所駁正出以示予予因取家藏拓本諦視之參以三家所釋得了然可信者七十二字錄於右方其介於疑似及文不全者姑闕之漢時掾史辟本郡人爲之文陽蕃薛卞皆魯之屬縣此碑當爲魯相紀德而作正面磨滅無字惟碑陰獨孖然亦剝裂似竹葉紋俗因謂之竹葉碑也

膠東令王君廟門碑

右膠東令王君廟門碑乾隆乙未歲濟寧人李東琪於州學古

樹下梧得之濟寧學故有漢碑五得此而六洪氏隸續載其文
有二段今止存前半數十字爾

哥

楊紹買冢地劄太康五年九月

右楊紹買冢地劄文云大男楊紹從土公買冢地一邱東極闕
澤西極黃滕南極山背北極於湖直錢四百萬卽日交畢日月
爲證四時爲任太康五年九月廿九日對共破劄民有私約如
律卽律字令案古人稱分券爲別若今人合同文字也周禮小宰
聽稱責以傅別鄭司農云傅別謂券書也傅傳著約束於文書
別別爲兩兩家各得一也鄭康成云傅別謂爲大手書於一札
中字別之傅別故書作傅辨鄭大夫讀爲符別辨與別聲相轉
其義一也說文無劄字釋名劄別也大書中央中破別之也廣

韻別分契也。前種概移時也。古者書契多以竹簡故傳別字或从竹隸變作前與移時之前相混釋氏書往往用記前字亦取受記作符券之義魏晉以前契券之式傳於今者惟此故錄其全文以證好古者

梁

始興忠武王愔碑

右始興忠武王碑文浸漶失其大半諦審之尚有千三百餘字其額云梁故侍中司徒驃騎將軍始興忠武王之碑凡十七字獨完好梁時定官品爲十八班班多者爲貴司徒十九班侍中十二班而結銜侍中在司徒之上蓋其時以侍中爲親要之任出入帷幄與參大政儼然居三司右矣

後魏

孫秋生等二百人造像記太和七年

右孫秋生等二百人造像記孟廣達文蕭綱慶書首稱大代太和七年蓋自道武建國稱魏仍兼稱代崔浩所云代魏兼用猶彼殷商者至孝文時此號尚未改也額題邑子像旁刻邑主中散大夫滎陽太守孫道務寧遠將軍中散大夫潁川太守安成令衛白犢二人名記之下方列維那程道起等諸人名而後題景明三年歲在壬午五月戊子朔廿七日造距太和七年癸亥已二十載蓋後來續刻者記今在洛陽縣黃氏中州金石攷曾載之惟誤以秋生爲狄生顯慶爲額楷齒蘭條字作條字書未載惟見於此刻

比干碑陰太和十八年

右比干碑陰題名凡八十二人曰使持節驍騎大將軍都督司

豫荆郢洛東荆六州諸軍事開府司州牧咸陽王臣河南郡元

禧侍中司徒公都督中外諸軍事太子太師駙馬長樂郡開國

公臣長樂郡馮誕使持節司空公太子太傅長樂公臣河南郡

正目陵亮字一特進太子太保廣陵王臣河南郡元明侍中始

平王臣河南郡元緄領尚書右僕射吏部尚書任城王臣河南

郡元澄散騎常侍祭酒光祿勳卿高陽伯臣河南郡元徽太

子右詹事姑藏伯臣隴西郡李口右旁似散騎常侍北海王臣

河南郡元詳散騎常侍領司宗中大夫臣河南郡元膏散騎常

侍臣河南郡元纂右衛將軍臣河南郡元翰光祿大夫行太僕

少卿臣高陽郡李堅中常侍中尹高都子臣上黨郡秦松驩驤

將軍臣河南郡大野口司衛監臣河南郡元蚪司衛監臣河南

郡万忸于勁員外散騎常侍光祿勳少卿東平子臣河南郡正

目陵純兼司衛監少府少卿臣魏郡游雅給事黃門侍郎臣太原郡郭祚給事黃門侍郎領著作郎臣清河郡崔光典命中大
夫太子中庶子臣廣平郡游肇羽林中郎將臣河南郡侯莫陳
益員外散騎常侍帶宮與給事中臣河南郡正目陵惠太子率
更令襄陽伯臣河南郡元尉給事中臣河南郡乙旃括給事中
臣河南郡乙旃免給事中臣河南郡郁久悶麟右軍將軍臣河
南郡元口太樂給事臣長樂郡衛況給事領太醫令臣高平郡
李循給事臣河南郡侯文福給事臣河南郡万怵乎矜中給事
錄太官令臣上黨郡白整中給事臣高陽郡劇鵠射聲校尉臣
河南郡元洛干顯武將軍臣河南郡万怵乎吐拔直閣武衛中
臣高車部人斛律慮直閣武衛中臣河南郡乙旃阿各仁直閣
武衛中臣河南郡侯呂阿倪直閣武衛中臣河南郡叱羅吐蓋

直閣武衛中臣上谷郡董明惠直閣武衛中臣代郡若干侯莫
仁直閣武衛中臣河南郡乙旃應仁直閣武衛中臣河南郡吐
雞其命直閣武衛中臣上谷郡張代連長兼典命下大夫齊郡
王友臣趙郡李預兼給事黃門侍郎員外散騎常侍守屬國下
大夫臣太原郡王翔白衣守尚書左丞臣遼東郡公孫良散騎
侍郎東郡公臣河南郡陸昕散騎侍郎臣河南郡郁久閭敏散
騎侍郎臣中山郡甄琛中壘將軍帶登聞令臣廣平郡游綏中
黃門令帶典農令臣安德郡雙蒙宰官令臣河南郡伊婁願太
官令鉅饒伯臣口口魏祐監御令臣河南郡莫耐婁悅符節令
臣代郡賀拔舍通直散騎侍郎臣河澗郡邢辯通直散騎侍郎
臣京兆郡韋縡武騎侍郎守蘭陵令臣高平郡徐舟武騎侍郎
臣河南郡獨孤遙武騎侍郎臣上谷郡張璽武騎侍郎臣河南

郡乙旃侯莫于武騎侍郎臣河南郡万忸乎澄武騎侍郎臣趙
郡李華符璽郎中臣河南郡拔拔臻符璽郎中臣上谷郡張慶
員外散騎侍郎臣博陵郡崔廣員外散騎侍郎臣博陵郡崔逸
員外散騎侍郎臣河南郡陸怖道尚書郎中貝邛男臣清河郡
傅脩期尚書郎中臣荑陽郡鄭長遊尚書郎中臣清河郡崔哲
尚書郎中臣河東郡張映尚書郎中臣遼東郡高觀尚書郎中
臣趙郡李引尚書郎中臣河內郡司馬定尚書郎中臣南陽郡
朱孟孫尚書郎中臣蘭陵郡蕭彥尚書郎中臣趙郡李良執尚
書郎中臣河東郡柳崇案北史太和十九年詔遷洛人死葬河
南不得還北於是代人南遷者悉為河南洛陽人又云太和二
十年正月詔改姓元氏今此碑立於太和十八年冬宗室已禁
元姓代人竝稱河南郡則史所載歲月恐未得其實矣諸臣稱

河南郡者元氏而外若邛目陵氏万忸于氏侯莫陳氏乙旃氏
叱羅氏吐難氏伊婁氏獨孤氏拔拔氏莫耐婁氏竝見魏書官
氏志而譯字小有異同如邛目陵之目作穆万忸于之万作勿
吐難之吐作土莫耐婁之耐作那是也陸氏本步六孤氏太和
十九年詔稱穆陸賀劉樓于嵇尉八姓皆太祖已降勲著當世
位盡王公者也穆卽邛目陵于卽万忸于劉卽獨孤諸人皆未
改氏而陸昕等已單稱陸氏蓋陸氏之改又在穆賀諸姓之先
矣大野氏郁久閭氏侯呂氏魏志俱失載以于攷之郁久閭乃
蠕蠕姓後亦單稱閭氏周書太祖賜韓襄姓侯呂陵氏此廣韻所引今
本侯編當卽侯呂氏也後魏末有南州刺史大野拔此廣韻所引今大野亦代
北著姓矣又有侯文福一人則未知其侯氏歟官氏志侯叔抑氏後改侯氏抑
別有侯文氏也若干氏賀拔氏不稱河南而稱代郡蓋代人之

未南遷者斛律氏稱高車部人雖入處中國尚未有所隸州縣也馮誕以尚樂安公主拜駙馬都尉此但云駙馬而去都尉從俗稱也史稱傳永字脩期此直云傳脩期蓋以字行也公孫良據傳爲燕郡廣陽人此云遼東郡則舉郡望言之于勁嘗爲司衛監李預兼典命下大夫皆本傳所未載陸昕傳作昕之當以石刻爲正其書姑臧爲姑藏河間爲河淵龍驤爲驪驤傳脩期作脩脩期皆當時承用別體字若万忸于之于或作乎陸希道作怖道則翻刻之譌

金剛般若經

右金剛般若經石刻譯金剛般若經者有羅什流支真諦耶舍元奘五家世所傳惟鳩摩羅什譯本云佛在舍衛國者是也此經乃後魏時流支所譯舍衛城作舍婆提城其餘文句亦多異

所說四句偈云一切有爲法如星翳燈幻露泡夢電雲應作如是觀蓋不止於六如矣首題三藏菩提流支在胡相國秦太上文宣公弟譯文宣公者靈太后之父胡國珍也魏書外戚傳國珍之薨追崇假黃鉞使持節侍中相國都督中外諸軍事太師領太尉公同州牧號太上秦公諡文宣故稱相國秦太上文宣公也史稱國珍雅敬佛法行年八十自強禮拜而不載就第譯經事畧之也碑書第爲弟从古也隋書經籍志永平中有天竺沙門菩提留支大譯佛經與羅什相埒留支卽流支也碑雖不著年月以字體驗之當是北魏人書膝卽膝字穉卽穉字獲卽獲字也卽陀字笨卽算字畝卽亂字皆它碑所罕有也

隋

張洪亮等造像記

開皇十五年四月

右張洪亮等造像記文云大隋開皇十五年口次乙卯四月己
丑朔八日丙申維那張洪亮等敬造口光像一軀二菩薩上爲
皇帝陛下州縣令長又爲七世父母援及一切衆生成同斯福
後列維那孟清等十人清信女李荒女等九人諸女名有稱王
次男張元妃管那子者其書隋作隋次作次爰作援劉作劉皆
字體之異者石刻在青州府城南廣福寺前人未有著錄者李
進士素伯始訪得之

宋文彪等造澧水石橋碑

右宋文彪等造澧水石橋碑元和郡縣志南和縣開皇三年屬
洺州十六年改屬邢州此碑稱洺州南和縣蓋在開皇十六年
以前矣邢州所統諸縣襄國南和平鄉舊屬洺州鉅鹿內邱柏
仁舊屬趙州隋書地理志皆不書惟元和郡縣志詳載之證以

石刻始知吉甫之精核也其文有云斜眺衡彰却瞻瀛竭以彰
爲漳以竭爲竭古人偏旁相同之字多可代用或云漢隸从水
之字或作彡此以漳爲彰蓋置水於右旁也

榮澤縣令常醜奴墓誌 大業三年八月

右榮澤縣令常府君墓誌後魏時有万俟醜奴趙醜奴鳩鳩主
醜奴此府君亦名醜奴字文泰本名黑獺而醜奴之祖亦名黑
獺蓋當時人名多如此醜奴以周保定元年起家右勳侍下士
三年轉膳部下士建德元年遷天官府口中士隋初不仕開皇
十九年詔以周代文武舊加優選因授都督又授鄭州榮澤縣
令祿滿言歸大業元年十一月十九日終春秋八十有六攷字
文建國關中用蘇綽盧辯之議依周禮設官其名繁多史不能
悉載而開皇一詔亦隋史所宜書故略敘其所歷官位如右誌

又稱後魏孝武帝為明帝此宅書所未見也

潛研堂金石文跋尾續第二

嘉定錢大昕

唐

秦王告少林寺教

武德四年四月

右秦王告少林寺教刻於裴淮少林寺碑之上方末題四月卅日蓋武德四年之四月也其云上柱國德廣郡開國公安遠者李安遠也新舊書本傳俱作廣德郡公誤少林寺僧以柏谷塢歸唐安遠奉秦王教往宣諭蓋在征王世充時裴淮碑稱寺西北五十里有柏谷墅居晉成塢在齊爲郡王充僭號署曰轅州乘其地險以立奉成太宗文皇帝軍次廣武僧志操惠瑒曇宗等審靈睭之所往辨誣歌之有屬率衆以拒僞師抗表以明大順執充姪仁則以歸本朝太宗嘉其義烈頒降璽書宣慰旣奉優教兼承寵錫賜地四十頃水碾一具裴所稱優教者卽指此

刻其述寺僧翻城顛末亦可裨史家之闕

虞公溫彥博碑 貞觀十一年十月

右虞公溫彥博碑字存者僅十之一說文遼行謹遼也遼及也二字本不相通率更書往往借遼爲遼如醴泉銘遼乎立年此碑遼輔德愆報是也案尔疋釋言遼遼也方言遼及也關之東西曰遼或曰及禮記所以遼賤也陸德明釋文本作遼公羊傳祖之所遼聞也漢石經亦作遼是遼遼二字古書通用隸楷相承變遼爲遼遼與遼遼字相混爾

姜行本紀功碑 貞觀十四年六月

右姜行本紀功碑文多剝落有云使持節光祿大夫吏部尚書上柱國陳國公侯君集交河道行軍大總管副總管左屯衛大將軍上柱國永安郡開國公薛萬均副總管左屯衛將軍上柱

國通川縣開國男姜行本等口整三軍襲行天討又云以通川
公口謀特出妙思縱橫命口前軍營造攻具乃統沙州刺史上
柱國望都縣開國侯劉德敏等鼓行而進以貞觀十四年五月
十日師次伊口攻唐書姜行本傳高昌之役爲行軍副總管出
伊州距柳谷百里依山造攻械其處有漢班超紀功碑行本磨
去古刻更刊頌陳國威靈卽此碑也行本嘗討通川縣男新舊
史皆失載碑今在哈密城北天山之麓土人名閭石圖漢言碑
嶺也侯君集傳稱高昌平君集刻石紀功乃別是一碑今已無
存舊一統志誤以此卽君集所刻乃云高昌卽土魯番地東去
哈密尚一千五百里此嶺在天山上當是君集旣平高昌凱旋
而東過此山因而勒石倣竇憲勒銘燕然之意震耀武功非勒
石於高昌國都今案碑額題大唐左屯衛將軍姜行本勒石紀

文則非君集所刻明其君集克高昌在八月癸酉而碑立於六月辛卯蓋在進兵之時亦非凱旋後所刻也唐書西域傳拜侯君集爲交河道大總管左屯衛大將軍薛萬均薩孤吳仁副之碑無薩孤吳仁名疑西域傳誤

贈太師比干詔并祭文

貞觀十九年二月

右贈太師比干詔并祭文元延祐四年脩廟碑稱唐碑斷仆於地伐石宅山載爲刊建卽是碑也碑爲元時重刻故多空文如梓林當爲梓材直宏文館直作宣皆傳刻之誤唐書太宗紀贈比干太師諡忠烈在二月丁巳此祭文題二月己亥朔廿日戊午與史差一日碑末題司徒太子太師趙國公無忌開府儀同三司中國公士廉光祿大夫民部尚書莒國公唐儉吏部尚書駙馬都尉柱國安德郡開國公楊師道中書令江陵縣開國子

岑文本正議大夫守中書令兼太子左庶子馬周中大夫守黃門侍郎褚遂良右貞觀十九年二月廿日無忌等奏請以贈比干詔并祭文刻石樹碑奉勅依奏無忌三公士廉開府皆名而不姓異於餘官也攷宰相表士廉以開府儀同三司同中書門下三品平章政事遂良以黃門侍郎參豫朝政碑刻不書者蓋其時猶不以爲官名史稱同三品入銜自張文瓘始平章事入銜自郭待舉始皆高宗朝事也

鄂公尉遲敬德碑

顯慶四年四月

右鄂忠武公尉遲敬德碑止存下截可辨識者約五百字趙子函遊九峻記云碑自額以下埋土中掘而出之了無一字今去趙氏作記時又百五十年而碑字可辨識者尚多則知子函所云非其實矣碑文許敬宗撰文苑英華錄其全文以石本校之

開有異同當以石本爲正如貞觀四年授襄均鄧漸唐五州都督襄州刺史石本均作郡攷唐書地理志均州貞觀元年廢八年復置又云武德四年置都州貞觀八年州廢敬德除都督在貞觀四年其時有都州無均州也顧寧人云凡數字作壹貳叁肆捌玖等字皆武后所改此碑立於顯慶中有云贈絹布壹千伍伯段米粟壹阡伍伯石則不始於武后矣

道因法師碑龍朔三年十月

右道因法師碑中臺司藩大夫隴西李儼字仲思製文奉義郎行蘭臺郎渤海縣開國男騎都尉歐陽通書其云中臺司藩大夫者通鑑龍朔二年二月改尚書省爲中臺胡三省注謂二十四司郎中皆改爲大夫主客爲司藩杜岐公通典所載同惟司藩作司藩以是碑證之則通典爲正唐書百官志武德三年改

司藩郎曰主客郎中龍朔二年改禮部曰司禮祠部曰司禮膳部曰司膳獨不及主客之爲司藩蓋轉寫渴脫爾儼書郡望書字而通獨否未詳其故蘭臺郎卽祕書郎亦龍朔所改也碑有具禍以蓋語今本毛詩作燼攷說文無燼字火餘之燼當作夷方言蓋餘也自關而西秦晉之閒炊薪不盡曰蓋則蓋其本一字馬融長笛賦蓋滯抗絕李善注蓋與燼同陸元朗詩釋文亦作蓋蓋唐初諸儒傳授之本如此釋文雖云或作燼然夷已从火不應更著火旁疑流俗所加故陸氏不從之也竇軌傳封贊皇縣公宰相世系表書鄭公此碑稱贊國公蓋由贊皇縣公進國公而傳失書耳軌父恭仕周封鄭國公故軌亦承父封鄭省邑旁作贊古字通用也

贈秦師孔宣公碑

乾封元年

右贈泰師孔宣公碑說文太卽泰之古文故此碑太師太宰皆用泰字碑云荷蕢微者翻爨擊磬之心又云岱畎洳濱採怪石而宣浮磬皆以磬代磬字案左氏傳室如懸磬國語作懸磬韋昭謂府藏空虛但有槩梁如懸磬也禮記石聲磬注云磬當爲磬字之誤也予謂鐘磬皆以聲得名釋名磬磬也聲堅磬磬然古文磬作磬史記樂書石聲磬磬以立別是磬磬卽磬磬也磬磬同物康成以爲字誤者失之新舊唐書霍王元軌傳不載爲兗州都督事可據以補史之闕

燕公于志寧碑乾封元年十二月

右燕公于志寧碑碑稱所著文集勒成七十卷而舊唐書本傳云有集二十卷經籍志又云志寧集四十卷皆誤也

新史錄文志與舊志

同志寧罷相後嘗爲岐州刺史此新舊書本傳所失載而趙氏

金石錄亦未之舉故爲表而出之

栖霞寺明徵君碑

上元三年四月

右栖霞寺明徵君碑徵君者南齊處士僧紹朱錫也以爲梁處上山賓蓋承舊唐書明崇儼傳之誤山賓仕梁通顯沒贈侍中非處士也據碑捨宅爲寺乃僧紹第二子臨沂公仲璋而崇儼傳以爲山賓故宅皆誤也碑稱僧紹祖玩晉建威將軍而南史云州中從事父略宋平原太守中書侍郎而南史云給事中未知孰是碑稱移居鬱洲拊榆山而史作弁榆拊弁本一字金陵在明代有南京之稱此碑云乃屈南京似先爲之識矣

中興三藏聖教序

神龍三年五月

右中興三藏聖教序在長清縣四禪寺碑亦斷裂文字可辨者不及二百名首行云大唐中興三藏聖教序中興二字鑿去餘

七字及次行御製二字尚完好金石錄載此碑在濟南長清縣界西禪寺西禪當作四禪乃轉寫之訛碑爲唐奉一書結體在隸楷之間益都李素伯云寺在新家莊官道旁距靈巖寺甚近

口部將軍功德記

景龍元年十月

右口部將軍功德記唐時并州置天兵軍口部珣以右金吾衛將軍爲天兵中軍副使因造三世佛像於太原之天龍寺碑文八分書而首行郭謙光文及書六字則篆書金石文字記關謙光之名今據石本補之珣妻黑齒氏燕國公常之之中女常之百濟西部人而此碑亦有本校東海之語金石文字記疑珣亦作京海誤系出百濟與常之同降唐者爾碑末題景龍元年歲在鶡首鵠首於十二次屬未是年太歲在丁未也

老子道德經

景龍二年正月

右老子道德經兩卷上卷曰道經下卷曰德經分兩面刻之其額云大唐景龍二年正月易州龍興觀爲國敬造道德經五千文碑末題觀主張督行名案河上公注本道可道以下爲道經卷上上德不德以下爲德經卷下晁說之跋王弼注本謂其不析道德而上下之猶近於古不知陸德明所撰釋文正用輔嗣本題云道經卷上德經卷下與河上本不異晁氏所見者特宋時轉寫之本而翻以爲近古亦未之攷矣予家藏石刻道德經凡五本惟明皇御注本及此本皆分道經德經爲二蓋漢魏以來篇目如此而此本爲初唐所刻字句與它本多異如無作无愈作俞芸作云舉作豫荒作忙佐作作喻作翕之類皆從古字又如故能蔽不新成石本作能弊復成師之所處荆棘生下石本無大軍之後必有凶年二句上將軍居右下石本無言以喪

禮處之句夫唯病病是以不病聖人不病以其病病是以不病
石本但云是以聖人不病以其病病是以不病此類皆遠勝它
本聊舉一二以見古石刻之可貴也

景龍觀鐘銘 景雲二年九月

右景龍觀鐘銘并序凡一十六行二百六十八字後題年月二
行云辛亥金癸酉金丁亥土以納音言之也睿宗御製文既典
雅而字亦奇古金質堅久無剝蝕可稱三絕序云耶溪集寶麗
經收珍銘又云傾巖集寶竭府收珍未免重複之病

涼國公契苾明碑 先天元年十二月

右涼國公契苾明碑明卒於鑿鑿即諱元年臘月以萬歲通天

元年八月葬肅政御史大夫婁師德為製碑文文稱長子左豹
韜衛大將軍兼賀蘭州都督涼國公名已漫漶然上半從字猶

依稀可辨。據唐書本傳云：子儼襲爵，則是儼字。但此碑前云：授長男從三品，而次子嵩崇等名皆從山。又疑當爲儼字，蓋卽從而移其山於下耳。末題先天元年十二月十六日，孤子息特進上柱國涼國公嵩蓋立。石距製文之時已十有六年。長子沒而更以嵩襲公爵，亦史所失載也。碑用武后新製字，惟府君之君聖人貞觀之聖，仍書本字。

淨域寺法藏禪師塔銘

開元四年五月

右淨域寺法藏禪師塔銘。田休光撰文，正書，無姓名。法藏姓諸葛氏，蘇州吳縣人，吳郡太守蘇州刺史璆之曾孫。隨閬州刺史穎之孫，唐少府監丞禮之第二子也。武后時嘗奉勅於東都大福先寺及化度寺檢校，無盡藏。以開元二年十二月卒，而建碑於四年五月。其書率堵波作瘞暗波，則它刻所未見也。碑稱隨

信行禪師撰三階集錄數十卷隋經籍唐藝文志皆未載予又攷隋書文學傳有諸葛穎者丹陽建康人官著作郎終正議大夫未嘗爲閬州刺史其父名規梁義陽太守亦不名譽則與法藏之祖雖同時而非一人矣

幽栖寺尼正覺浮圖銘

開元六年七月

右幽栖寺尼正覺浮圖銘不著姓氏開元六年七月十五日建真書時帶隸體其銘曰咬見頷高葺此臺塔妍巖疑語凝原擬業皆用雙聲而詞不工以東坡江行見月四言較之殆有仙凡之別矣碑云入仙法海仙卽佛字黃叔璥中州金石攷云碑在汜水縣之多寶院

華嶽精享昭應碑

開元八年

右華嶽精享昭應碑記開元八年遣舊相尚書許國公蘇頲

雨西嶽感應之事華陰縣主簿平陽咸廩撰殿中侍御史彭城劉升八分書不署年月刻於後周華嶽頌碑之陰攷蘇頌以開元八年正月罷相爲禮部尚書本傳不載遣禱雨西岳事略之也密邇之邇作秝蓋走兔偏旁字古人多相通代用耳碑左方又有八分書逆華魏魏竹箭喧阗浩浩今古憧憧往來十六字則銀青光祿大夫守兵部尚書博陵郡開國公崔漢衡所題而華陰縣令盧倣書其時興元元年十二月也又有銀青光祿大夫檢校華州刺史上柱國李休光題額二十字驗其字體亦出盧倣手蓋勒碑之後又六十餘年而始題其額耳碑前兩行下半空處有貞元元年二月檢校水部員外郎崔頴華州司功參軍鄭齊昭華陰縣令韋綬三人題名其下則宋元豐五年正月通直郎劉陶題名碑中空處又有政和壬辰二月顯謨閣直學

士庶旦及子奎益題名其餘明人題名不及載

嵩岳少林寺碑
開元十六年七月

右嵩岳少林寺碑裴灌撰并書新舊史皆爲灌立傳其封正平縣子則史所失載也或謂子男五等封爵之細於史傳可不書然嘗攷之唐史如魏徵嘗封鉅鹿縣男杜如晦嘗封建平縣男孔穎達封曲阜縣男又進爵爲子歐陽詢封渤海縣男歐陽通封渤海縣子韋虛心封南皮縣子吳兢封長垣縣男柳沖封河東縣男俱載於本傳未嘗從略則此之不書者難免疎漏之譏矣

東林寺碑
開元十九年七月

右東林寺碑李北海書後題開元十九年七月十五日建攷張又新記稱李公作東林寺碑手筆一軸俾模而刊石藏於寺者

凡百一十三歲釋雲泉一旦視碑卷歎曰莫石莫刊將焉用僧
遂募緣成其事會河東裴公開府鍾陵開泉志願亦垂信扼因
自染翰贊列爵秩名氏於卷末泉乃得募而刊於碑是開元中
此文初未刻石刻石乃在會昌之世正裴休刺洪州時也唐書
裴休傳不云爲洪州刺史則史文之略也碑燬於元延祐七年
及重紀至元之三年番陽丁信可再摹刻之

齊州神寶寺碑開元二十四年十月

右齊州神寶寺碑李寰纂兼書

李字上半漫漶或疑是子字今其上有缺文則其姓也

在長清縣靈巖山寺本沙門明公駐錫之所唐時改今名以寺
北有寶山東有神谷故也古人書丹於石遇石缺陷處則空而
不書此碑及景龍道德經石刻皆然

碑側

右碑側刻佛說蜜多心經一卷行書似懷仁聖教序末一行殘缺不得書人姓名

臨高寺碑 開元二十五年四月

右臨高寺碑宣義郎前懷州獲嘉縣主簿常允之撰弟文林郎吏部常選演之書碑文完好可誦歐趙諸家俱未著錄黃叔璥云今在閩鄉縣其書葺爲蒼騰爲騰躍爲躍莫爲莫皆別體也閩本从召而碑从召蓋召召二文唐人已相溷矣

立周太師尉遲迴廟碑 開元二十六年正月

右立周太師尉遲迴廟碑歐陽棐集古錄目云前華州鄭縣尉閻伯璵撰序祕書省校書郎顏真卿撰銘今驗石刻良然趙德甫但以爲顏公撰者攷之未詳爾李綽撰尚書故實稱張嘉祐開元中爲相州都督解字有焚異郡守物故者連累政嘉祐至

則於正寢整衣冠通夕而坐夜分屏開歎息聲俄有人自西廡而出衣巾盤纓形器憔悴歷階而上直至於前嘉祐因厲聲問曰是何神祇來至於此答曰余後周將尉遲迴也死於此地遺骸尚存願托有心得罪葬祭前收守者皆膽薄氣劣驚悸而終非余所害人指一十餘歲女子曰此余之女也同瘞廡下明日召吏發掘果得二骸備衣衾棺器禮而謝之越二夕復出感謝因曰余無他能報效願裨公政節宣水旱惟所命焉嘉祐遂以事上聞請置廟歲時血食上特降詔褒異勒碑敘述卽此碑也

御注道德經

開元二十六年十月

右明皇御注道德經開元廿三年令天下應脩官齋諸州皆於一大觀立石臺刊勒歐陽公趙德甫所收者皆懷州本久不傳

邢州本歸熙甫嘗見之今未審尚存否予所收則易州本也石
幢凡八面額題太上元元皇帝道德經大唐開元神武皇帝注
首載開元廿年十二月十四日勅末題開元廿六年歲次戊寅
十月乙丑朔八日壬申奉勅建戊字少一撇後列易州刺史田
仁琬別駕周憲長史鄭景宣司馬杜欽賢諸人名懷州本經文
御書注則諸王所書此幢經注皆出於一手驗其筆迹蓋蘇靈
芝書也石文間有殘缺亦有石本元缺者如其事好還脫好還
二字用之不可既脫既字信者吾信之脫信者二字知我者希
則我者貴石本止有知我者貴四字以注證之皆當與今本同
易州刺史田公德政碑開元廿八年十月

右易州刺史田公德政碑今在保定府之蓮池書院田琬以開
元廿四年治州有善政廿八年遷攝御史中丞安西都護以去

州人立石頌之碑云公名琬字正勤而趙氏金石錄鄭氏金石略于氏天下金石志竝題作田仁琬德政碑今易州龍興觀石刻道德經末亦題刺史田仁琬名元和郡縣志又書易州刺史田琬碑刻立於當時稱名必無差誤不知何以異同若此也唐曾要凡授都督刺史階未及五品者竝聽著緋佩魚雖任則停之若在軍賞緋紫魚袋者在軍則服之不在軍不在服限琬階正議大夫正四品上其結銜稱賞紫金魚袋蓋以軍功得之與賜紫借紫者有別矣唐六典諸軍各置使一人其橫海高陽唐興恆陽北平五軍皆本州刺史爲使又曾要高陽軍本在瀛州開元二十年移在易州故琬以易州刺史兼高陽軍使也合黎軍府之名唐書地理志失載不知屬何州也琬嘗爲靈州刺史朔方軍節度副使押渾部落仍檢校豐安定遠及十將兵馬使

攷之於史吐谷渾部落初自涼州徙鄯州不安其居復於靈州之故鳴沙縣置安樂州以居之又靈州黃河外有豐安安遠新昌諸軍安遠蓋定遠之爲故朔方節度得兼押渾部落使領豐安定遠二軍也十將兵馬使史無文以證之

大智禪師碑陰記開元二十九年五月

右大智禪師碑陰記河南少尹陽伯成撰亦史惟則書伯成嘗爲戶部郎中見唐書崔沔傳

石壁寺鐵彌勒像頌開元二十九年六月

右石壁寺鐵彌勒像頌其文云石壁谷隨御隋隸西壽陽縣唐改壽陽爲文水先朝分置交城而立寺焉案隋書地理志文水舊曰受陽開皇十年改焉交城開皇十六年置是文水之改名交城之置縣皆在隋時碑以爲唐時改者蓋誤而交城之由文

水分則又史所未及載也又攷元和郡縣志壽陽縣本漢榆次縣地西晉於此置受陽縣卽今文水縣是也開皇十年改受陽爲文水縣又於受陽故城別置受陽縣卽今縣是也貞觀十一年改名壽陽唐志亦云壽陽貞觀十一年更名是壽陽之名寔唐初所改隋志書已改之受陽作受字別置之受陽作壽字似誤碑云隋隸西壽陽縣攷隋時兩受陽不並置當因文水在今壽陽之西故土人稱西以別之不云受陽而云壽陽者據後所改而稱之也

兗公之頌

天寶元年四月

右兗公之頌開元廿七年制追謚孔子爲文宣王贈顏子淵兗公天寶初都督李庭誨命曲阜縣令張之宏爲頌其序云宣王旣已第焉兗公豈宜關爾似之宏尚有文宣王頌而今不傳矣碑末列名者丞隴西牛孝麟主簿平陽霍廷玉尉廣平宋休口

天水趙再良尉員外直同正員高陽許瑾邠王文學文宣公孔
璣之攷唐書宰相世系表璣之作璣之當從碑爲是唐六典上
縣尉二人中下縣尉一人曲阜爲縣尉故得員外置尉也碑云
公名同字子泉易淵爲泉避高祖諱顏氏家廟碑有若子泉宏
都之德行亦是也顏之推云孔子弟子處子賤處義之後俗字
亦爲宓或復加山今兗州永昌郡城舊單父地也東門有子賤
碑漢世所立乃云濟南伏生卽子賤之後是知處之與伏古來
通字誤以爲宓較可知矣今本史記仲尼弟子列傳作宓不齊
此碑亦用宓賤字正之推所譏爲俗字也碑書儒作儒宴作宴
亦異文

嵩陽觀紀聖德感應頌天寶三載三月

右嵩陽觀紀聖德感應頌唐宋碑刻多以撰人姓名列第一行

書人姓名次之題額者又次之此碑首題開府儀同三司行尚書左僕射兼右相吏部尚書崇元館大學士集賢院學士朔方節度等副大使上柱國晉國公臣林甫上太中大夫守河南尹河南水陸運使上柱國賜紫金魚袋兼東京畱守判畱司尚書省事臣裴迴題額碑末始題朝散大夫檢校尚書金部員外郎上柱國臣徐浩書與它碑式異季海官卑不敢與林甫迴並列故也賜紫金魚袋賜緋魚袋例書於結銜之末此獨在兼官之上碑本八分書獨題年月處作小篆亦它碑所罕有也唐書宰相表天寶十載正月丁酉林甫遙領單于安北副大都護充朔方節度等使碑建於天寶三載林甫已領朔方節度副大使疑史有缺譌矣其兼崇元館大學士集賢院學士則本傳所未載徐浩傳亦不載檢校金部員外郎皆略之也明皇本紀天寶三

載二月河南尹裴敦復討吳令光此碑題額者爲河南尹裴迴
迴與敦復未審卽一人否

逸人竇居士神道碑 天寶六載二月

右逸人竇居士神道碑李邕撰段清雲書案唐書本紀天寶六
載正月辛巳殺北海郡太守李邕此碑立於是年二月則在邕
歿之後當時邕有重名而死又非其罪故身歿而文猶見刻古
人之重文行不重勢利如此居士之季子元禮官梨園教坊使
行內侍省內侍而碑文多述其戰功蓋以宦官董軍如楊思勳
之類碑文稱元禮正議大夫後題制新加銀青光祿大夫蓋由
正四品上轉正三品下也柳子厚述唐時葬令云凡五品以上
爲碑龜趺螭首降五品爲碣方趺圓首居士無位而立碑於法
爲僭特以其子方爲內侍故當時不以爲非雖以李北海之強

直且爲製文宅人固無論矣碑末一行云其碑傾覆承事郎奉
元路涇陽縣尹兼管本縣諸軍與營勸農事姚達禮雅飭爲重
立時元後至元六年歲次庚辰四月某日

潛研堂金石文跋尾續第三

嘉定錢大昕

唐

怡亭銘 永泰元年五月

右怡亭銘序六行二十二字李陽冰篆銘五行四十字後題年月二行皆李萑八分在武昌縣江中洲嶼間夏秋江漲則沒於水故拓本稍難得王象之輿地碑目亦遺之又江夏縣有陽冰篆鄂州二字世傳初篆時鬼神泣空中士大夫爭摹以致遠謂可禦魑魅今不知所在矣廣韻裴姓伯益之後封於豔鄉因以爲氏後徙封解邑乃去邑從衣此碑裴一從衣一从邑兩字通用也末題永泰元乙巳歲不云元年者歲年同物省文互見也裴虬字深源大歷四年爲著作郎兼侍御史道州刺史杜子美集有次湘江宴餞裴二端公赴道州詩卽虬也

李寶臣紀功載政頌 永泰二年七月

右成德軍節度使李公紀功載政頌王佑撰王士則書士則蓋武俊之子其署銜稱推勾官案史節度使之屬有推官有衙推此推勾官疑卽推官矣寶臣之降唐封清河郡王唐書藩鎮傳不載却有進封隴西郡王事然宰相世系表止稱清河郡王疑傳之誤也

晤臺銘 大歷二年六月

右晤臺銘後題大歷二月歲次丁未六月十五日刻次山尚有浯溪唐廐二銘皆瞿令問篆書以地僻蘇厚難搨惟此銘世多有之雖不著書人姓名當亦令問筆也說文只有浯字晤唐則次山自出新意名之書家以其形聲相應卽依偏旁而爲之篆所謂自我作古也李少溫名陽冰本取木華海賦陽冰不治之

義其兄澌字堅冰皆冰霜之冰也而少溫書名亦從俗作冰蓋
由楷書借冰爲父相承已久章奏告身既用冰字篆書不便更
易故爾

李氏遷先塋記 大歷二年

右李陽冰書遷先塋記宋大中祥符三年吳興姚宗萬以年代
較遠字體不完率好古者數人出錢令武威安琮重開題名於
首行空處今碑已中斷損二十許字矣說文改更字从戊己之
已數改字从辰巳之巳徐鉉引陽冰說謂已有過支之即改而
此碑書改元字却从巳不从已秦詛楚文改亦從巳蓋二文可
假借也耗字說文玉篇廣韻集韻俱不載惟家語執轡篇息土
之人美耗土之人醜注耗耗字此少溫所本矣敘說文从支此
與三墳記俱从又泉卽洎字水當在左旁變文居下

三墳記

右三墳記與遷先塋記同時立皆李季卿文陽水書桌光刻碑末無重開年月而字畫更明顯筆力似較弱蓋開鑿又在前碑之後也文云下土得漑上腴成賦說文無漑字蓋用楚辭后土何時而得漑語又云僅逾強仕以講陰堂後漢書周磐夢見失師東里先生與講于陰堂之輿既而長歎其月無病忽終記蓋用此事也吳當从亦而碑从夭聲當从収而碑从𠂔聲刻之謫

龔邛令庾公德政頌大歷五年九月

右龔邛令庾公德政頌凡十三行題年月于碑文之前字特大它碑所罕有也碑建於大歷五年至金貞元三年龔縣令宋佑之訪得之廳事後龔土中斷壞散亡僅存其半復訪於邑人彭

魯家得舊榻本重勒之石佑之自爲記鄉貢進士卜儒卿爲跋
竝刻於碑之左方龔邱漢寧陽縣地北齊置平原縣隋以縣東
南二十里有龔邱城更名宋大觀四年避宣聖諱祇稱龔縣金
大定二十九年避顯宗諱復改爲寧陽縣元明以來因之碑書
荀爲荀案說文無荀荀二字除鉉新附
有荀字廣韻荀本姓郇後去邑
爲荀則荀姓當書爲郇今書作荀所未詳也

謙卦碑

右李陽冰書易謙卦謙字凡二十見無一同者其以謙譌謙代
謙字世多疑之案漢書藝文志易之嗛嗛一謙而四益顏氏注
嗛字與謙同大學此之謂自謙鄭氏注謙讀爲嗛荀子臭之而
無嗛于鼻楊倞注與嗛同蓋謙嗛嗛三字古皆通用也說文脣
古文籃字集韻廉古作脣廉與籃聲相近故可借用碧落碑飛

廉之廉作厝蓋省一少此碑以言旁厝爲謙則借廉爲兼也詩說文多語也唐韻汝閭切與謙字音雖相近而義各殊未知少溫所據

左金吾衛將軍臧希晏碑

大歷五年十月

右左金吾衛將軍臧希晏碑首云有唐廣德二年八月五日朔左金吾衛將軍臧公薨於□□安邑里之私第享年五十有三
大歷五年十月十五日葬於三原縣長功鄉則碑立于大歷間
明矣而金石文字記以爲廣德二年八月殆未諦審其全文乎
撰碑者爲銀青光祿大夫兵部侍郎清河郡公張某其名不可
辨

文宣王廟新三門記

大歷八年十二月

右文宣王廟新三門記朝散大夫檢校祠部員外郎兼侍御史

裴孝智撰前義王府倉曹參軍裴平下丹并策額下丹者書丹也孝智出自東眷官至都官郎中見唐書世系表明皇子有義王玢平殆其府之屬吏乎記文有閔宮霞散句吾友吳訓導玉搢疑散爲蔽之譌予意當是蔽字而省其艸爾集韻蔽蔽二字互相通

干祿字書

大歷九年正月

右顏元孫干祿字書第十三姪男真卿書魯公元刻在湖州今所傳者宋人翻刻本在四川之潼川府頃孟吏部超然視學蜀中拓以贈予案唐書地理志濠州鍾離郡濠字初作豪元和三年改从濠韓退之有徐泗豪三州節度掌書記廳石記洪慶善攷退之作記在貞元十五年因據唐志以證俗本作濠之誤而吳曾能改齊漫錄駁之且引杜佑通典稱濠州北齊爲西楚州

隋改曰濠州因濠水爲名而唐初因之佑上通典在貞元十年其書初不見豪字以此知韓文作濠者爲是今攷此碑元孫結銜海陵沂豪三州刺史豪不從水旁石刻分明可以徵信又廣韻豪字下注州名古鍾離國隋改爲州廣韻本於孫愐愐撰唐韻在天寶十載足徵其時州名不從水也李吉甫元和郡縣志亦云武德五年杜伏威附改濠州濠字中間誤去水元和三年又加水焉正與唐志相合杜氏通典偶漏不載而吳乃據以議歐志之失豈其然乎

杭州錢唐縣丞殷君夫人碑

大歷

右杭州錢唐縣丞殷君夫人顏氏碑第十三姪男金紫光祿大夫行湖州刺史上柱國魯郡公眞卿撰并書首云君號口定琅邪臨沂人北齊黃門侍郎之推府君之平皇朝秦王記室思魯

府君之曾著作郎集賢學士勤禮府君之孫文中又稱祕書監
元孫府君太子少保惟貞府君自父祖以上皆稱府君而直書
其名所謂臨文不諱也篇中不稱夫人而稱君亦變例也稱曾
弔而去孫字與漢尹宙碑同唐書殷踐猷傳族子成已晉州長
史初母顏叔父吏部郎中敬仲爲酷吏所陷率二妹割耳訴冤
敬仲得減死及成已生而左耳缺云讀此碑乃知卽魯公之姑
其二妹者一爲宜芳令裴安期妻其一則殘缺不可辨矣殷君
之名殘缺不見寶刻類編載顏魯公書有殷履直夫人顏氏碑
開元二十六年立在洛陽疑卽此碑也夫人以開元二十五年
卒明年正月附葬此碑乃魯公爲湖州刺史時追立蓋在大歷
間

贈太子少保顏惟貞廟碑 建中元年十月

右贈太子少保顏惟貞廟碑唐書稱貞卿爲師古五世從孫以
此碑證之魯公乃崇賢學士勤禮之曾孫師古與勤禮爲親兄
弟則魯公於師古爲從曾孫不得云五世從孫也廣韻顏姓出
琅邪本自魯伯禽支庶有食采顏邑者因而著族又邾武公名
夷字曰顏故公羊傳稱顏公後遂爲氏然則琅邪顏氏出自姬
姓與曹姓之顏源流各別碑稱邾武公名夷甫字顏子友別封
邾爲小邾子遂以顏爲氏多仕魯爲卿大夫魏有青徐二州刺史
盛始自魯居于琅邪臨沂孝悌里與廣韻異魯公自云官階
勳爵竝至二品子以史證之太子少師官也光祿大夫階也皆
從二品上柱國勳也魯郡開國公爵也皆正二品

顏魯公像并奉使蔡州書

右顏魯公像并奉使蔡州書在同州府宋靖康元年七月祕閣

修撰知同州唐重所刻題云重就摹公之像於蒲繪而祠之又訪得此石本狀只老矣公以乾元元年自同徙蒲至秦使時垂三十年氣節不衰而狀只非昔也乃刻石而寘之祠室俾觀者有歎焉案魯公以貞元元年乙丑爲李希烈所害時年七十六則乾元元年戊戌年止四十九故二像鬚眉不無壯老之別重字聖任眉州彭山人建炎初以天章閣直學士知京兆府與金人戰城陷死之蓋忠義得之性成宜其有慕于魯公也

藏真律公二帖

右僧懷素草書藏真律公二帖宋時爲京兆安師孟家藏有周越馬宗誨劉摯韓忠彥趙瞻諸人題跋其云寬夫者文彥博也徽仲者呂大防也穎叔者蔣之奇也冲元者許將也固者孫固也元祐八年游師雄以安氏藏本模刻于長安漕臺之南齋元

符三年孫軫龕置便廳壁間俱有題識

蜀丞相諸葛武侯祠堂碑元和四年二月

右蜀丞相諸葛武侯祠堂碑元和四年立是時武元衡以宰相出鎮西川裴度柳公綽皆爲幕僚唐書元衡傳所云開府恆一時選者是也柳公綽傳稱武元衡節度劍南與裴度俱爲判官尤相引重今案裴公時爲節度掌書記公綽以營田副使兼成都少尹皆非判官特同在帥府耳碑不見于歐趙二錄王象之撰輿地碑目始載之明時碑已剝落蜀府承奉滕嵩訪得舊本鐫補其闕文巡撫四川監察御史藍田榮華跋于右方空處其左有康熙十一年巡撫羅森題字

南海廣利王神廟碑元和十五年十月

右南海廣利王神廟碑首行題字與全文大小疎密不類似

經後人磨改昌黎集本題中無廣利王三字此碑有之蓋磨治
添入者碑左側有明嘉靖丙戌施儒題名右側則萬歷癸巳王
宏詩等題名予諦觀其行間及下空處隱隱有字跡蓋昔人所
題爲儒與宏詩磨去可恨

忠武軍監軍使朱孝誠碑

長慶元年二月

右朱孝誠碑題云唐故忠武軍監軍使寧遠將軍守內常侍員
外置同正員賜紫金魚袋上柱國贈雲麾將軍左監門衛將軍
朱公神道碑忠武軍節度副使朝議郎檢校尚書職方郎中兼
御史中丞上柱國賜紫金魚袋蘇遇撰翰林待詔朝議郎行常
州司法參軍上柱國曹鄴書并篆額在三原縣乾隆戊子歲縣
人培土得之頃江寧嚴侍讀冬友遊秦中歸摹以遺予書法流
麗可愛其文有云元和初張伯靖負固敘州嘯聚蠻落公銜命

於假授之際撫諭於溪洞之中遂使投戈感恩歛衽向化掉三寸舌息數州兵案唐書憲宗紀載伯靖之降不言何人所招致嚴綬傳則云遣將賈徽開曉羣蠻悉降亦不言所遣者何人讀此碑乃知孝誠實銜命以行孝誠乃中人非綬部將亦足以裨史文之闕史稱伯靖徽州蠻碑作敘當以碑為正孝誠為李光顏監軍平淮西破李師道皆預有功光顏自忠武徙鎮邠寧孝誠仍留監忠武軍碑云嚴蔡牢落陳許瘡痍二年之中四更節將公撫新懷舊軍郡帖然蓋紀光顏徙鎮以後事忠武軍初領陳許二州元和十二年增領滁州十三年又增領蔡州故兼舉嚴蔡也其云午參之機變繆子之薦賢此用春秋傳伍參戰國策繆賢事伍參古今人表作五參說文五从二陰陽在天地間交午也是午與五通

李紳題名 寶歷元年二月

右李紳題名在肇慶府之七星巖其文云李紳長慶四年二月
自戶部侍郎貶官至此寶歷元年二月十四日將家累遊凡五
行自左而右郭功父石室遊徧云攷二李之勁筆謂李北海石
室記及此刻也唐書本傳敬宗立李逢吉乘閒言紳不利于陞
下請逐之帝初即位不能辦乃貶紳為端州司馬攷敬宗以長
慶四年正月卽位二月辛巳始聽政紳之貶官正在此時其明
年改元寶歷矣

西平郡王李晟碑

太和三年四月

右西平郡王李晟碑晟薨於貞元九年卽以其年葬後三十五
年為太和元年子聽官義成節度使疏請立碑于墓乃勅宰相
裴度撰文柳公權書之碑文簡略不及史傳敘事之詳惟云乾

元初客武都值酋豪以缺守邊亂殺掠平人公與所從十數馳而射之殪其爲魁者餘黨遂遁寇所虜獲積如邛山公一無所取惟椎牛醢酒享士而去邦人具狀以聞特拜左清道率則新舊史俱未之載也晟祖思恭洮州刺史父欽左金吾衛大將軍今南監本汲古閣本唐書世系表云思恭金吾刺史欽左洮州衛大將軍乃轉寫之謫爾碑經後人重開雖開架尚存而神采頓減如裴晉公署銜當云特進守司空今謫守爲爵俗生不通官制以臆妄改甚可笑也

阿育王寺常住田碑

太和七年十二月

右阿育王寺常住田碑前祕書省正字郎蔣齊融撰順陽范的書的刻越州隱士順陽其本望也唐時祕書省著作局集賢院司經局皆設正字或四人或二人階或正九品下或從九品上

此碑結銜係以郎字不知何時所增也于季友撰後記及季友的贈答詩卽刻於碑之左方朱錫鬯以爲碑陰者誤

五經文字

右五經文字三卷國子司業張參撰成於大歷十一年洎開成中始刻于石朱錫鬯謂參姓名僅一見于宰相世系表一見于藝文志子攷唐書李勉傳嘗引李巡張參在幕府後二人卒至宴飲仍設虛位沃饋之又常袞傳袞始當國議增給百官俸時韓滉使度支與袞皆任情輕重滉惡國子司業張參袞惡太子少詹事趙基皆少給之是則史于參事固不止一再見矣吾于勉傳見參之見重友朋又于袞傳見參之不阿貴近參雖無傳未爲不幸也石刻參字下以多後人妄改從小

九經字樣

開成二年八月

右九經字樣前載開成二年八月十二日中書門下牒牒尾列
銜者六人曰工部侍郎平章事陳夷行曰中書侍郎平章事李
石曰門下侍郎平章事李固言曰右僕射兼門下侍郎國子祭
酒平章事賈並與唐書宰相表合鄭覃以僕射不書姓唐宋故
事如此曰檢校司徒平章事劉下注使字而不名者劉從諫也
攷本傳太和初拜司空六年入朝明年遷藩進同中書門下平
章事不云檢校司徒而宦官仇士良傳稱澤潞劉從諫上書請
清君側士良沮恐進從諫檢校司徒欲弭其言則傳蓋漏此事
矣傳云進司空而三公表無之當是檢校司空非真拜也表于
檢校官例不書曰司徒兼中書令下注使字姓名俱不書者裴
度時爲山南東道節度使也

大達法師元祕塔碑

會昌元年十二月

右大達法師元祕塔碑裴休撰其署銜稱山南西道都團練觀察處置等使攷唐書方鎮表建中元年升山南西道觀察使爲節度使嗣後無降爲團練使事蓋史文有脫漏爾休傳不載觀察山南西道一節亦略也

吏部尚書高元裕碑

大中六年十一月

右吏部尚書高元裕碑元裕以大中六年六月廿日薨其年十一月十日歸葬河南府伊闕縣白沙之南原碑今在洛陽縣南三官凹蓋伊闕地後併入洛陽矣碑題渤海縣開國男而新舊書本傳稱封渤海郡公蓋史之誤北史高勣字敬德襲父爵清河王改封安樂侯當作樂安唐書世系表作樂安侯碑稱敬德改封樂安王未詳孰是或始封王而例降爲侯乎恭僖皇太后敬宗母王氏懿安皇太后憲宗后郭氏也

南翔寺尊勝陀羅尼經幢

右尊勝陀羅尼經石幢二在嘉定縣南翔寺大殿前東西相對一立于咸通八年十二月一立於乾符二年八月皆題建幢弟子莫少卿老宿僧行齊院主僧文脩名宋太平興國五年元元統二年皆嘗重修鐫記歲月于幢上太與泰古文只是一字漢書食貨志三登曰泰平此幢題年號作泰平興國李陽冰先塋記書天寶作天珣古人於本朝年號或用古文別體書之無所嫌也寺在縣城南二十四里寺有煙火萬家商賈所集爲吾邑大鎮予少時乘舟過此者三四皆未聞泊丁亥歲南歸王鶴溪爲予言寺有唐石幢乃往訪之薄暮讀其文不及搨而還己丑夏予將北行鶴溪募工各搨一紙遺予吳中少唐以前石刻此幢雖經後人重修尚是唐物顧志乘未有及之者予集錄金石

刻絕遠如隴蜀閩粵及西北塞外碑碣頗有入予錄者惟此得之獨後始知古蹟之蔽于耳目之前者不少而鶴溪之嗜古好事爲難得也

吳承泌墓誌
乾寧二年十二月

右內樞密使特進左領軍衛上將軍知內侍省事上柱國濮陽郡開國侯食邑一千戶食實封一百戶吳承泌墓誌翰林學士裴庭裕撰翰林待詔間相書文云乾寧二年春正月二十日薨于漣水年四十五稟君命也冬十月一日上御札于中書門下許公昭雪十一月二十日葬于京兆府萬年縣漣川鄉北姚村禮也承泌以景福二年由宣徽北院使除樞密未及二載而誅誅之未久又得昭雪蓋其時朝廷爲方鎮所制生殺之權不能自主以史攷之景福二年鳳翔李茂貞稱兵而樞密使李周潼

殺乾寧二年邠寧王行瑜等稱兵而樞密使康尚弼殺承沅除
官在周潼之後尚弼之前中朝多故其不免于死宜矣宣徽
密唐時爲內侍之職五代始以士人爲之而樞密之權幾在宰
相上宋以樞密爲執政官而宣徽南北院使恩數亦視執政與
唐時名同而實異矣

萊州刺史唐貞休德政碑

右萊州刺史唐府君德政碑今在萊州府治文字殘缺撰書人
姓名立碑年月皆不可攷貞休新舊史俱無傳以碑所載歷官
攷之蓋嘗爲華州司倉參軍岐州扶風縣令雍州奉天縣令安
國相王府諮議參軍比部郎中洛州洛陽縣令遷萊州刺史由刺
史遷都督以去案唐書百官志景雲二十置都督二十四人察刺史
以下善惡秩比侍御史貞休除都督蓋在其時碑文都督下似

是潭字疑除潭州都督也宰相世系表稱貞休鄆州刺史不及萊州者據所終之官言之也趙氏金石錄有萊州刺史于府君碑沙門重閏八分書開元十年七月立此碑亦八分書以年代攷之正相近疑德甫所收卽此後人轉寫誤以唐爲于爾德甫嘗知萊州碑見在州治不應獨遺之

趙琮墓誌

右趙琮墓誌前武衛兵曹參軍田口書文多漫滅其略曰趙氏襲卽裔天水別口易州來水縣頃因先父海陽從軍地遠

徙居青府君諱琮字光有男三人女一人乙未歲季夏月五日

遇疾青州之私第卽第丙申年七月三日得言夕殯茲都縣南

五里建口雲門山東卽岡原其首行題曰唐故居士天水趙

府君墓誌銘文中世字缺筆知其爲唐刻也此石今在益都李

文藻南湘家

後唐

振武節度使李存進碑

同光二年十一月

右振武節度使李存進碑前幽州節度判官呂夢奇撰夢奇蒙
正之大父也五代史存進傳敘其歷官本末甚略且多舛誤傳
云太祖攻破朔州得之賜以姓名養爲子從太祖入關破黃巢
以爲義兒軍使今以碑攷之國昌帥振武時存進已在帳下及
從克用立功爲節度押衙左廂衙隊威雄第一都副兵馬使奏
授銀青光祿大夫檢校太子賓客兼監察御史大順元年遷殿
中侍御史景福二年五月始賜姓名補充右廂義兒第一院軍
使其時距入關破巢幾及十年攻破朔州又在其前安得卽有
賜姓名爲養子之事乎傳云歷慈沁二州刺史據碑則存進在

太祖時已嘗權知汾石二州軍州事莊宗時真授石州刺史再
知汾州軍州事又授慈州刺史又權知沁州軍州事蓋未嘗真
授沁州刺史也通鑑載晉王在魏時以沁州刺史李存進爲天
雄都巡按使攷異云莊宗實錄稱軍城使存進傳稱都部署莊
宗列傳及薛史存進傳皆云天雄軍都巡按使今從之予攷碑
文本云天雄軍都部署巡檢使它書作巡按者卽巡檢之譌或
云都部署或云都巡檢各就省文似異而實同也碑又云劉鄩
在華縣與主上對壘經年公在都城每切嚴備有日私謂人曰
此賊固險不戰必有多謀俾于南門多排弓弩以待之其夜果
有鄩黨攻城南門弓弩齊發死傷者甚衆遂令輕騎潛報主上
于東寨于是王師盡出及旦兩軍相遇于中途五万穴口剽戮
將盡惟鄩遁而獲免此事可補五代史及通鑑之闕存進字光

嗣年六十有八皆史所應載而失之者也通鑑同光元年追尊
祖國昌曰獻祖文皇帝五代史則云國昌謚文景此碑正作獻
祖文皇帝可正歐史之謬矣楊劉鎮碑作陽雷

吳

大安寺香爐題字

大和五年七月

右大安寺香爐題字在南昌府大安寺山陰徐壁堂知南昌縣
搨以遺予字皆陽文首云吳大和五年歲次癸巳七月乙亥朔
十五日己丑鑄此香爐重一万二千斤於大安寺大殿永充供
養上爲國王口口府尊令公州縣文武官寮云云又一面云尚
用工胡德蕭道昂丁從口寺造大殿上用釘二万口與香爐上
共緣化得鐵及錢收買共計用鐵一千四百斤打造上殿使用
竝足永充供養秀水朱氏跋略載此文頗以意更其次第於鑄

此香爐下增入收買鐵及錢打造七字今驗前後別無鐵及錢之文殆誤以及爲仄爾此爐重一萬二千斤後云緣化得鐵及錢收買共計用鐵一千四百斤者乃指打造鐵釘所用之數牽合爲一失其實矣朱氏所見拓本得之上元燈市故疑此寺當在金陵不知其在南昌也

南漢

黃蓮山銅鐘題字

大寶二年七月

右黃蓮山銅鐘題字凡四行文云粵惟大寶二年太歲己未七月甲辰十九日壬戌樂昌黃蓮山寶林禪院住持長光明徽大師賜紫沙門義初呂眾錄鑄造銅鐘壹口重肆伯斤勸首弟子給事郎守內侍省內府局令都監樂昌防遏諸都并監樂昌縣事賜紫金魚袋鄭徽贊以七月廿八日設齋慶讚永充供養致

韶州府志樂昌縣有寶林寺宋嘉祐三年僧圓祐建無所謂寶林禪院者至黃蓮山則志乘失載訪之樂昌人亦眇能舉其名矣此鐘不知何時移至韶州府學乙未歲四月予按試至韶謁先聖祠見此鐘臥儀門旁問之校官荅以方撤蓋賢舍委置于此既手摸其文并屬校官仍懸之明倫堂云

雲門山匡聖宏明大師碑

大寶七年四月

右雲門山匡聖宏明大師碑西御院使集賢殿學士御前承旨太中大夫行左諫議大夫知太僕寺事上柱國賜紫金魚袋陳守中奉勅撰列聖宮使甘泉宮使秀華宮使翫華宮使開府儀同三司行內侍監上柱國李托玉清宮使德陵使龍德宮使開府儀同三司行內侍監上柱國武昌縣開國男食邑三百戶龔澄樞承旨建右街大乾亨寺內殿供奉講論兼表白意法大師

賜紫沙門行脩奉勅書今在乳源縣之雲門山文偃唱道雲門
與臨濟爲仰曹洞法眼並稱五宗而此碑前人著錄無及之者
偃初住雲門之光泰禪院劉襲賜號匡真大師劉鋹大寶中追
謚大慈雲匡聖宏明大師五燈會元述師謚稱大慈雲匡真宏
明蓋誤合前後謚號爲一又以光泰爲光奉亦轉寫之謬也審
聖文武隆德高明宏道大光孝皇帝蓋銀所上尊號當據以補
十國春秋之闕守中文詞博覽行脩書亦不俗而十國春秋不
錄其名氏蓋志伊亦未見此碑也

南唐

元寂禪師塔碑

開寶二年五月

右上都右街龍光禪院故元寂禪師塔碑朝議大夫守中書侍
郎充光政殿學士承旨南陽縣開國男韓熙載撰朝議郎守中

書舍人充集賢殿學士知院事徐鉉題額將仕郎試右千牛衛
倉曹參軍直尚書禮部張藻書後題開寶二年不稱大宋蓋其
時雖用中朝正朔而未嘗以宋號冠之文中稱楊吳順義太和
唐保大紀年至去帝號以後但稱歲辛酉壬戌并不用建隆之
號熙載豈甘心事小朝廷者縱聲伎自滌辭相位而不居良有
以也熙載官中書侍郎光政殿學士承旨與宋史合其稱金陵
爲上邳則宅書所未載也禪師名隱微預章新淦人葬于吉州
吉水縣仁壽鄉太平里元帥鄭王時任保釐捨財俾營塔廟攷
之宋史後主弟從善嘗封鄭王意卽其人歟予家藏石刻千餘
通獨未得南唐碑頌益都朱進士廷基出宰吉水搨此本見貽
喜而跋之

北漢

天龍寺千佛樓碑

廣運二年八月

右天龍寺千佛樓碑推誠佐命保祚功臣特進行尚書左僕射兼中書侍郎平章事上柱國隴西郡開國公食邑三千戶臣李惲奉勅撰翰林書令史劉守清書翰林書令史王廷譽篆額惲以宰相奉勅撰文列名碑文之前守清廷舉則列名于碑末年月一行之下不稱臣亦不云奉勅微之也吳任臣十國春秋載此碑頗多闕文今得石本校之可識者尚廿許字舛誤者又數字始歎博聞之家又以審核爲難爾